



Maria Barla Beer-Riedi

27.02.1929 - 11.04.2008

La tatta ei naschida ils 27 da fevrer 1929 a Tschamut. Ensemen cun ses siat fargliuns ha ella passentau ina ventireivla affonza. Ella ha frequentau las scolas cheu a Sedrun. Suenter la scola ha ei giu num dad ira egl jester, per emprender tudestg, sco era per gudignar raps.

Entras sia onda Tina che steva ad Aarau ha la tatta survegniu ina piazza en ina cascharia, nua ch'ella ei stada circa in onn. Aunc da cuort ha ella raquintau da quella piazza e quei onn ad Aarau, e per ver, quella cascharia dat ei aunc oz.

Silsuenter eis ella returnada a Sedrun, ha luvrau a Mustér tier la famiglia da Cusseglier naziunal Giusep Condrau. Ella haveva ina pulita paga. Ses geniturs legrava ei zun fetg da survegnir in sustegn supplementar, damai che la famiglia era carschida sin 8 affons.

Mia tatta ei stada la sora veglia ed aschia in grond agid per bab e mumma, damai che ils fargliuns eran memia giuvens per era sustener la famiglia.

Igl onn 1953 ha miu tat, Gion Giachen Beer, menau mia tatta agl altar da nozzas. Dieus ha benediu la ventireivla lètg cun 6 affons, che han purtau bia sulegli e legria, mo era lavur e quitau. Malgrad sia gronda lavur, las supplementaras activitads e siu engaschi en uniuns, ha ella adina giu temps e carezia per sia famiglia.

Igl onn 1980 ei mia tatta secasada cun miu tat e cun mei a Cuera. Jeu sun carschida si tier els, ed els han adina mirau e giu quitau da mei sco sch'jeu fuss in agen affon dad els. Nus vein passentau bia bials onns a Cuera, denton schaven els adina puspei encrescher per ils ses ella biala Val Tujetsch. Il tat ha luvrau tochen 1988 tier la cascharia Toni a Cuera.

Suenter sia pensiun ha ei giu num pachetar e serender anavos ella biala Val Tujetsch. 3 onns suenter, igl onn 1991 ei miu tat morts nunspitgadamein ella vegliadetgna da 62 onns e mia tatta ei daventada vieua.

Ils proxims onns ein stai fetg grevs, denton ha la tatta adina gudiu fetg la cumpignia ed il contact cun amitgs, amitgas e convischins. Gi'onn 1994 ha ella giu l'emprema attacca dil cor. Silsuenter eis ella adina puspei vegnida confruntada cun autras malsognas e gronds mals.

Avon circa 11 meins ha ella stuiu serender el spital a Glion. Leu ei ella vegnida confruntada danovamein cun grondas dolurs. Dau si ha ella mai. Ella veseva adina ina glisch sclarenta e veva bia forza ed energia. Onn ei stau ina liunga stad, il bia ha la tatta passentau el spital a Glion. Strusch a casa, veva ei puspei num, che la tatta seigi puspei el spital. Entschatta settember eis ella lu serendida en Casa S. Vigeli a Sedrun.

Gl'emprem schava ella encrescher fetg per siu da casa sin Gionda, denton ils emploiai dalla Casa S. Vigeli han mirau bein dad ella e fatg bien, e la finala steva ella bugen leu.

Suenter ina veta cumplenida da lavur ed activitatad, pleina da quitaу per ils ses eis ella spartida da nus tut nunspitgadamein il venderdis, ils 11 d'avrel 2008 ella vegliadetgna da 79 onns.

Per nus tuts ei ina veta cun bia carezia, gronda lavur ed engaschi ida alla fin. Nunspitgadamein – naven dad in mument sin l'auter eis ella buca pli cheu. Egl avegnir vegn siu plaz a restar vits per nus tuts, el cor da mintgin vegn ella a viver vinavon.

Cara tatta, nus engraziein a Ti da tut cor per tut il bien che has fatg per nus, Ti eis adina stada cheu per nus ed has dau a nus zun bia carezia. Ti mauncas a nus.